

## Transkription von Urkunde HST 1314b

Ort, Datierung: Stralsund, 1314-03-01

Signatur: Stadtarchiv Hansestadt Stralsund, StU 0121 [\[online\]](#)

Inhalt: Wizlaf van Ruyen: Stadtrecht

In godes namen amen . We wizlaf van godes ghenade , vorste tho ruyen . Bekennen vn(de) tǔghen in dessen openen breuen . Dat we / mit beradene mode vnde mit gudem willen na rade vser truwen manne hebben ghe gheuen vnde ghe laten eweliken vser leuen / stat tome stralessunde vnde allen inwoneren der suluen stat , de nǔ sint vnde noch tokomende sint , alsodane rechticheit vn(de) vriheyte / als der stat to Rostok van hern borwene vnde sinen kinderen hinrike vnde claweze van oldens is ghe gheuen vnde ghe laten / Quemet also des nicht en sche , dat rostok in ereme rechte vnde erer vriheyte krenket worde Jodoch scal vse stat tome stralessunde vn(de) / alle inwonere bi sodaneme rechte vnde vriheyte bliuen eweliken al so hir vore screuen is „\* Vort mer gheue we en gantzen eghendom / eweliken vnde ymmer over de stat stralessunde vnde ouer al dat bynnen erer schede is , an lande watere versch vnde solt / an weyde an holte busch vnde struke mor vnde brūk , acker buwet vnde vnghebuwet vnde visgherie mit aller nǔt vnde vriheyte / to des stades rechte . De schede to lande wart beghint aldus , van der schede to voghedehaghene vp de schede to luderhaghene / van der schede went v̇p de schede tom voghelsanghe vort van der schede v̇ppe lutzower schede , Dar van vort bet v̇p de schede / to langhendorpe „ van der schede vort bet v̇p gherbodenhaghens schede vort went went v̇p kedingherhaghen schede bet in dat / solte water Hir na beghint des solten wateres schede van der nygen owe wente tome ende des ihelandes , van denne / wente to deme ende to v̇manz van denne vort wente to byssin , van byssin wente to der beke brezenitz mit der se to terin / mit dem denehohne , weder vort bet to der nygenowe bynnen desser vorbenomeden schede in beyden siden des ouers vnde des / strandes mit gantzen eghendom mit vriheyte vnde mit visgherie mit aller nǔt to stades rechte also hir vor bescreuen is / Bynnen desser schede des solten wateres scholen vse man vnde vse lantzeten mene mit en visgherie hebben „ vort gheue we och / vser stat tome stralessunde dat vtuoerent went it en euene kǔmt „ vorbat wolde yenich man schuldeghen vse borghere tome stralessunde / de scal en volghen in de stat tome stralessunde vor den voghet vnde vor de ratman to richte als eyne stades recht is . It ne were dat he / butene an eneme anderen richte breke oder dat men eme to spreke v̇mme lenghut dar he man van were „ vort mer leydes wille=kores vn(de) aller anderen vriheyte also se van olders hebben ghehat scholen se brūken , Hir vn bouen scal vse stat tome stralessunde in al eren anderen hantvestinghen de se hebben vnvorsumet wesen , Vort mer dor vromen vnde dor makes willen vser stat tome stralessunde gheue we vnde sunderliken ghvnnen en des dat se moghen vnde scholen er besculdene ordele voren vn(de) halen to lubeke v̇mme / desse vorbenomeden stücke hebben se vs ghe gheuen sesdusent marc wendescher pennynghen vn(de) vsen tollē weder vri den se / koft hadden vor vifdusent marc pennynghen den seluen tollē scal men nicht vorhoghen mer he scal al so bliuen , als he heuet / van olders ghewesen „ Worde yenich schelinghe v̇mme den seluen tollē . de scholen de ratman tome stralessunde vntscheden mit eren / eyden . vn(de) dat scal dar bi bliuen . Och scholen vse man bi sodaneme rechte bliuen als it van olders heuet ghewesen Hir / mede scal endet vn(de) gheleghert wesen . al vnghemv̇t . vordachtnisse vn(de) twidracht . ofte yenich twisschen vs . vn(de) vser stat tome stralessunde heuet ghewesen . vn(de) we scholen er holde vn(de) er ghenedege here wesen . vn(de) se scholen vse truwen borghere wesen , / v̇ppe dat desse vorbenomeden stücke van vs van vsen erfnamen

vn(de) vsen nakomelinghen vast vn(de) vntobroken eweliken / bliuen . so hebbe we desse scrift mit  
vseme yngheseghele beseghelet to eneme eweghen orkunde De tughe de dar over weren / heten aldus .  
Her nycolaus pudbuske . Her siuert van plone . Her ernest budde de voghet Her nycolaus van starkowe  
/ perrere to bart . Her otte slore de pleban van dem stralessunde . Her johan dotenberch . Her herman  
van wokenstede . Her reynuart / van penitze . Her johan kabolt riddere . vn(de) vele guder anderen lude  
Desse brif is ghe gheuen vn(de) ghescreuen in d(er) / stat tome stralessunde na godes bört dusent iar  
drehundert jar in dem verteyden jare des vridaghes na allermanne / vaste